

INUIT ATAQATIGIIT

INATSISARTUNI



Nuuk, 18.04. 2013

Inatsisartut Suleriaasianni § 37 naapertorlugu matumuuna Naalakkersuisunut imaattunik apeqquteqaateqarpunga.

(Inatsisartuni ilaasortaq Maliina Abelsen, Inuit Ataqatigiit)

Apeqqutit:

- 1. Annersaaneq angerlarsimaffinnilu eqqissivilliortitsinerit meeqqanik annersaanermik isigititsiffiukkajuttut akiorniarlugit qanoq Naalakkersuisut iliuuseqassamaarpat naalakkersuinikkullu qanoq anguniagaqarniarpat?**
- 2. Naalakkersuisuusimasut annersaanermik akiuiniarluni periusissatut upernaami 2013-mi saqqummiunnialersaagarisimasaat maanna Naalakkersuit ingerlatissamaarpat saqqummiullugulu?**
- 3. Naalakkersuisut inuiaqatigiittut annersaanermut ingalassimaartariaqaratta avammut suaarutigissamaarpat?**
- 4. Ataatsimoorussilluni annersaanermik akiuiniarluni, soorlu Naligiissitaanermut Siunnersuisoqatigiit Peqatigiiffillu 8.marts peqatigalugit Naalakkersuisut inunnik maligassiuisussanik atuillutik suleqateqarlutillu iliuuseqar-nissaq periarfissaasorivaat?**

Tunggavilersuut:

Nunatsinni piviusuuvoq annersaaneq inuiaqatigiinni ajornartorsiutaammat. Inuiaqatigiinni ajornartorsiut tamakkiinerusumik isiginnattaaseqarluni pinaveersaartitsiniarnikkut, katsorsaaniikkut, qaammarsaaniikkut annersaareersimasoqartillugulu aaqqiissuteqarnikkut suliarineqartussaavoq, minnerunngitsumillu qanigisariit akornanni annersaanerup millisarnissaa salliutillugu iliuuseqarfignarsiaqarluni. Taamaakkaluartorli Naalakkersuisooqatigiilernermit isumaqatigiisummi annersaaneq eqqaaneqarsimanngilaq.

Politiit 2012-imi ukiumoortumik nalunaarusiaanni Nunatsinniinaq politiit angerlarsimaffinni perulluliornermut 2864-iarlutik takkuttariaqarsimapput, taakkunani angerlarsimaffinni perulluliornermi meeqqat 450-it angerlarsimatillugit.

Piffissami kingullermit annersaasarneq pillugu inuiaqatigiinni nutaarsiassaqaartitsivinnilu oqallittoqaqaaq. Ataatsimoortumilli Naalakkersuisunit annersaasarnermut akerliunermik nalunaarumaataartoqarsimavoq, aamma "sakkukinnernik annersaasarneq" pineqartillugu. Pingaaruteqarpoq inuiaqatigiinni isiginnittaasariaatsimik sanngiilliartortitsinnginnissaq, soorlu "annersaaminilaannguarnernik" taaguusersuinikkut inuiaqatigiinnut iiuminarsaaniikkut, ulluinnarnilu akuerineqartutut isiginninnilernikkut. Tassani pingaaruteqarpoq annersaasarnerup aalakoornartortalinnik imertariaasitsinnut attavilernissaa. Imaakkaluarpormi imernikilliartuinnartugut, taamaattorli Politikommisær Niels Nyvang-ip oqarnera naapertorlugu missingersorneqarpoq politiit 100-riarlutik perulluliornermut takkukkaangata taava imaassimavoq ataasariaannarluni imigassartorsimanatik isumaqatigiinngitsut nipituuliortulluunniit siumugassaasarsimasut.

Inuiaqatigiinni oqallinneq tusarsaaqisoq, innuttaasunik nutaarsiassaqaartitsivinni akulerusi-maffioqisoq tassaaratarsinnaavoq annersaanermik akiuiniarluni immikkut ittumik iliuuse-

qarnissamut maannakkorpiaq periarfissaq.

Ukiakkut 2009-mi isumasioqatigiinneqarpoq "Nakuuserneq aaqqissutaanngilaq"-mik qulequtserneqartumik, soorlu aamma Nunatsinni qimarnguinni atorfillit ilinniarnernik immikkoortortakkaanut ukiuni ingerlasuni aamma ilinniartinneqartarsimasut, suliaanut sakkus-saqaleqqullugit. Tamanna imminermini naammanngilaq, taamaattumik Naalakkersuisusimasut tamakkiisumik isiginnittaaseqarluni annersaanermik akiuiniarluni periusissamik piareersaapput 2013-imi upernaakkut saqqummiunneqalersaarneqaraluartumik. Taamaattumik Naalakkersuisunngortut suliamik taassuminnga ingerlatsiniarnersut ujartuiffigissallugit soqutiginarpoq.